



## 牛仔話

有一個老實伯，生來矮細，面相普通，恁久看佢面帶幾分無奈，行路成時頭臥臥無看路，看等樹尾竹尾毋驚跌倒；成時又頭磬磬，目珠看等自家个鞋慢慢緊行，全無愛插別人，當像係想愛看大路有錢好拈無？

路項無大人愛搭佢，毋過，總係有一群細人仔圍等佢，因爭，想聽佢講牛仔話。佢嘴項總係咿咿喔喔唸唸唸，該係無人聽得識个話。

佢講牛仔話个本等，毋係三日兩日學會个，係有一擺佢又闊又譴，去投警察仔，一下緊張就結舌講：頭頭頭.....，警察仔聽無三句就講：頭那痛係無？該你帶等健保卡去分先生看，佢一下急性，又講，毋毋毋.....，警察仔當無閒，無等佢講忒，拿起電話喊來救護車，就載去醫院急診，但在救護車頂緊噉講：阿阿阿阿.....，毋過盡尾，還係無人知佢講麼个？就送入精神病院檢查三日三夜，看起來又正常，查毋出症頭，將就放佢轉去。

轉到屋，佢看著餓了三日夜个厥姆，就大聲噉起來，了後就毋會講話地，單淨會咿咿喔喔。

佢日日去挖番薯煮分厥姆食，見看著人，就用手指指等田頭家屋下，想講麼个，毋過大家都當無閒，無人有閒搭佢，單淨會笑佢講：又係共樣講該兜咿咿喔喔毋知麼个屁卵。有兜較好心个人，會添一碗飯分佢食，佢會咿咿喔喔頷頭，再將飯兜轉去分厥姆食，有兜人喊佢心肝愛放較開兜，佢就咿咿喔喔搖頭。包尾尋無人好投，就佢自家用手指指等田頭家屋下，一儕人嘍嘍嘍，撩刁个細人仔就越勢挑挑撩佢，日仔就恁樣無奈緊過，除忒細人仔，無人再過搭佢，下後佢堵著陂塘肚浸水寮凉个牛仔，佢乜講分牛仔聽，牛仔閒閒，毋會嫌佢，成時點頭、成時搖頭、成時拂尾，像會講牛仔話樣，該兜掌牛哥仔試著生趣，乜佢兼來鬥鬧熱。

自從會講牛仔話後，佢總算心肝較開地，人話又漸漸拈轉來，牛仔乜無相干，無論講麼个話，牛仔本本毋會嫌佢，本本成時點頭、成時搖頭、成時拂尾。

原來係佢去同頭家做工，頭家看佢老實，挑挑嫌佢雞公啼地還吉到工，愛扣工錢，佢急到結舌緊講，無無無.....呢，該係阿阿阿.....姆个藥湯錢，仰做得扣？

原來係厥姆該半夜破病，去逐先生來，等到臨天光開好藥仔，正趕去醫察頭家个，頭家無搭佢，扣了工錢後就無再請佢，佢滿哪仔去投，講話又毋斷句，無人搭佢，就越勢結舌蒂碓，盡包尾噉講毋出冤枉，無想著一條牛仔認真聽佢講話、無嫌佢囉嗦，噉救轉佢个話語，還分大家知著頭家醫察，分大家罵，只好還佢工錢，該兜本旦無閒聽佢講話个人，這下噉都有閒討論起這閒談笑科來。

作者：張捷明

### ☆詞彙學習☆

【頭磬磬】teuˊ qinˊ qinˊ：形容頭部低垂的樣子。【症頭】ziin teuˊ：疾病的症狀徵候。

【本等】bunˊ denˊ：本事、才幹。

【噉】gieu：哭。

【結舌】giedˊ sad：結巴。指說話不流利，常有【醫察】ngadˊ cadˊ：小氣，過度的節省。

字音重複或詞句中斷的現象。